



ԳԱՀԱԿԱԼԱԿԱՆ ՀԱՆԴԻՍՈՒԹՅՈՒՆ
ԱՆՏԻՈՔԻ ԵՎ ՀԱՄԱՅՆ ԱՐԵՎԵԼՔԻ ԱՍՈՐԱԿԱՆ
ՈՒՂՂԱՓԱՌ ԵԿԵՂԵՑՈՒ ՆՈՐԸՆՏԻՐ ՊԱՏՐԻԱՐԺ
ՆՈՐԻՆ ԱՄԵՆԱՊԱՏՎՈՒԹՅՈՒՆ ՄԱՐ ԻԳՆԱՏԻՈՍ
ԶԱՔՔԱ Ա-Ի

Սույն թվականի սեպտեմբերի 14-ին Դամասկոսի ասորական Ս. Գևորգ եկեղեցում տեղի է ունեցել Անտիոքի և Համայն Արեւելքի ասորիների նորընտիր Պատրիարք և Ասորական ուղղափառ եկեղեցու գերագույն Պետ Նորին Սրբություն Մար Իգնատիոս Զաքքա Ա-ի ընտրության և գահակալության հանդիսությունը:

Հանդիսությունը ներկա են եղել Սիրիայի Հանրապետության նախագահ Հաֆեզ Ասադի ներկայացուցիչ Աբդել Բերիմ Ադին, պետական մինիստր Անուար Համադեն, Լիբանանի Հանրապետության նախագահի ներկայացուցիչ մինիստր Միշել Մըրը և այլ պետական պաշտոնական անձինք:

Հանդիսությունը ներկա են եղել նաև քրիստոնեական տարբեր հարանվանությունների և դիվանագիտական մարմինների բարձրաստիճան ներկայացուցիչներ:

Ամենայն Հայոց Հայրապետի անունից Հայ Առաքելական եկեղեցին ներկայացրել է Դամասկոսի հայոց թեմի առաջնորդ Տ. Ոսկան ծ. վրդ. Գալբակյանը:

Ամենայն Հայոց Վեհափառ Հայրապետը իր 4 սեպտեմբեր 1980 թվակիր հեռագրով շնորհավորեց Մար Իգնատիոս Պատրիարքի ընտրությունը: Հայոց Հայրապետի հեռագիրը տպագրվել է «Էջմիածին» ամսագրի օգոստոսի համարում՝ էջ 10:

Պատրիարք Մար Իգնատիոս Զաքքա Ա-ն ծնվել է 1933 թվականին, Մուսուլում: Նախնական ուսումը ստացել է համայնքային դպրոցում, ապա սովորել է ծննդա-

վայրի Ս. Աֆրամ աստվածաբանական ճեմարանում և այն ավարտել 1954 թվականին: 1955 թ. եղել է Ասորի եկեղեցու պատրիարքի քարտուղար: 1957 թ. նոյեմբերի 17-ին ձեռնադրվել է վարդապետ հանգուցյալ Յակոբ Գ Պատրիարքի ձեռամբ: 1960 թ. մեկնել է Նյու Յորք, որտեղ երկու տարի սովորել է եպիսկոպոսական եկեղեցու աստվածաբանական վարժարանում, հմտանալով անգլերեն և արևելյան լեզուների, ինչպես նաև հովվական աստվածաբանության մեջ:

1962 և 1963 թթ. մասնակցել է Վատիկանի էկումենիկ երկրորդ ժողովի երկու սեսիաներին, որպես դիտորդ:

1963 թ. նոյեմբերի 17-ին ձեռնադրվել է եպիսկոպոս Մուսուլի վրա և ստացել Մար Սևերիոս Զաքքա անունը: 1969 թ. տեղափոխվել է Բաղդադ և գործել այստեղ որպես թեմի առաջնորդ մինչև իր Պատրիարք ընտրությունը: 1980 թ. հուլիսի 11-ին նա ընտրվել է Պատրիարք Ասորի ուղղափառ պատմական եկեղեցու: Նա հեղինակ է եկեղեցագիտական մի շարք գրքերի: Ունի դոկտորի աստիճան:

Սեպտեմբերի 19-ին, ուրբաթ օրը, Դամասկոսի հայոց թեմի առաջնորդ Տ. Ոսկան ծ. վրդ. Գալբակյանը, ընկերակցությամբ Տ. Սահակ քհն. Ալակերտյանի, պաշտոնական այցելություն է տալիս նորընտիր պատրիարքին և զրույց ունենում նրա հետ՝ ջերմ և սիրալիր մթնոլորտում:



ԱՆՏԻՈՔԻ ԵՎ ՀԱՄԱՅՆ ԱՐԵՎԵԼԷԻ ԱՍՈՐԻ ԵԿԵՂԵՑՈՒ ՆՈՐԸՆՏԻՐ ՊԱՏՐԻԱՐԿ
ՆՈՐԻՆ ԱՄԵՆԱՊԱՏԱՎՈՒԹՅՈՒՆ ՄԱՐ ԻԳՆԱՏԻՈՍ ԶԱԲԵՍ, Ա,